

Placi Monn-Venzin, Rueras

* 8.6.1894 † 7.12.1970



Varga 300 onns san «ils Monns» vegnir persecitai el cudisch da batten dalla pleiv da Tujetsch. Els ein la pli numerosa schlatteina da quella vischnaunca. Ins savess quasi crer che il Segner hagi giu en egl «ils Monns» empermettend ad Abraham che ses descendents duein daventar schi numerus sco il sablun alla riva dalla mar. Ni ha la finfinala Abraham priu la schlatteina «Monn»? Mo era els ein tuts in suenter l'auter entrai ella tiara dalla empermisschun. Il davos dils umens d'ina da quellas generaziuns ei il Placi staus, naschius ils anno 1894. Sia sora, la Barla Catrina «la pintga» sco ella senumna en famiglia, ei onns ed onns fideivla survienta egl asil a Compadials.

Agens tips eini stai «ils Monns». Quel che sfeglia in techet ella cronica da quella schlatteina anfla dètgas familias. Il tat dil car defunct, Giusep Antoni, naschius avon 150 onns (1820) ha tratg si diesch affons. In dad els, il Gion Antoni, ei emigraus ella Baviera. Il Sep Martin ei staus il tat da Sur Cállist Monn, e la Maria Culastia la mumma da Sur dr. Maurus Brugger. Quels da mia posa han aunc enconuschiu quèls vegls. Il Sep Martin che fageva adina l'impressiun d'ina um rüasseivel sco in patriarc, il Vigeli, che ha contonschiu l'aulta vegliadetgna da 92 onns e lu il Hans Giachen. Gie, il Hans Giachen, il bab da nies car defunct, a quel san ils buobs da Rueras, ensemen cun Sur H. Sgier che era da gliez temps tier el fumegl, dar in auter attestat. Bein udeva ins el beinsavens a sevilond sin nus buobs — empau ina genira — «Sacalots buezs». Mo cu el era aunc en ses vegls dis «paster da tgesa», lu savevan nus tgei ch'ei fuss «dir paternos», quasi aunc pir che tier il Vigeli pot.

Ina brava famiglia ha il Hans Giachen e sia consorta la Celestina Deflorin spisgentau ed educau, en tut diesch affons. Els ein tat u tatta d'in spiritual, Sur Cristian Monn a Cuera, fegl da Gion Antoni Monn, igl Americaner. Medemamein sin lur beadias Sr. Cecilia OSB, subpriura a Müstair, feglia da Giachen Antoni Monn, il brischavinars, e lu la Sr. Vigelia OP a Trun, feglia dil car defunct. La caratteristica da sia famiglia era urar e luvrar e gudignar, e quella caratteristica han era ses affons surpriu sco s. jerta.

En quella famiglia ha il Placi passentau sia affonza e giuventetgna. Essend il gudogn da calger che el e siu frar Hans vevan empriu da lur bab, ensemen cun empau puesser plitost strebels, ha el ed il Giachen Antoni entschiet a far il marcadont, principalmein marcadont da pors. Tgei strapazs ei quei bein stau! Savens, principalmein alla entschatta, stuevan ei purtar lur mercanzia sur l'Alpsu vin d'Ursera. Ei mava tras nevadas e cufla meinsvart dalla Scalina giuadora tochen a Vassa ed aunc pli lunsch. Ed il gudogn? Vessen ei stuiu pagar lur agens strapazs ed era ils Tschamutters che purtavan ils «tschichis» en sacs si dies tochen agl ault dil Cuolm d'Ursera, per lu cargar els e trer sin schliusa a maun ad Andermatt, pilver els vessen giu pauc auter che deficit. Mo els han tenu la dira, spargnau, luvrau e barhau ed han lu fundau lur atgna famiglia. Igl onn 1926, ella vegliadetgna da 32 onns — lu vevan ils giuvens purs aunc buca ton hers da maridar schebi che las Tujetschinas sbittavan nuota ils purs sco enquala d'ozildi — ha el menau l'Onna Catrina Venzin agl altar. Siat affons han els tratg si ed educau. Tuts ein ussa mess giu da maun e scadin — priu ora il pign — ha surpriu atgna responsabladad fundond atgna famiglia ni sededicond al survetsch dil concarstgaun en ina famiglia religiosa.

Denton, buca mo per la famiglia ha il Placi giu temps e peda. Onns ora eis el staus el cant baselgia, e siu character honzeli e sulegliv po meinsvart esser staus d'engrau en quei gremium, nua ch'ei deva — oz saiel buc, sche quei ei aunc adina il cass — enqualga in stemprau. Igl ei interessant che enqual sa cantar e bunamein el medem mument secattinar en honor da Dieu.

Ils davos onns da sia veta, suenter la mort da ses fargliuns — priu ora la pintga — era ei rüasseivel en sia casa. Mo aunc in sulet fegl e sia consorta fuvan cun el. El veseva: Miu pensum per quest mund ei prest alla fin. Savend che il pli grond e bi che tat e basat sa far ei da rugar e suffrir pils ses, mava el di per di a messa e brusari, tochen che sia malsogna ha era priu dad el quei pensum. «O cun mè voi béin, ad ju sun pinaus, per mè sai tuttina». Quèls plaids scheva el tier mintga viseta el spital. Aunc paucs dis avon sia mort sesenteva el pulit e fuss bügen puspei turnaus a casa. Mo il carstgaun propona e Dieu dispona. In cuort malesser e gia splunta la mort da camifo, ed ils 7 da december ein ses eglis saviarts per veser tgei che Dieu ha preparau per quèls che carezan el. El rüaussi en paisch!